

ISIZULU ULIMI LWASEKHAYA: IPHEPHA I
ISIZULU HOME LANGUAGE: PAPER I

Isikhathi: Amahora ama-3

Amamaki ayi-100

QAPHELA LOKHU OKULANDELAYO

1. Amakhasi aleli phepha ayi-18. Qiniseka ukuthi nelakho liphelele.
 2. Leli phepha lineziqephu **EZINE**, isiqephu **A, B, C** kanye no **D**. Bhekisisa ukuthi nelakho linazo zonke iziqephu.
 3. Qala isiqephu nesiqephu **EKHASINI ELISHA**. Uvumelekile ukuqala nayinoma ngasiphi isiqephu osithandayo kodwa usiphendule sonke usiqede ungaxubanisi imibuzo yeziqephu.
 4. Bhala izinombolo zemibuzo zibe njengoba zibhaliwe ephepheni lemibuzo.
 5. Bhala ngesandla esicacile, esifundekayo futhi umsebenzi wakho uhleleke kahle ngobunono.
 6. Fundisisa yonke imibuzo kahle ngaphambi kokuyiphendula.
 7. Ungabhali lutho ngale kwemajini. Shiya imigqa emibili njalo emuva kombuzo.
-

ISIQEPHU A UKUQONDISISA**UMBULO 1****1.1 Funda le ndaba elandelayo bese uphendula imibuzo ezolandela.****UKUTSHALA IMALI KUNGABA NOMPHEMELA OMUHLE NOMUBI**

- 1 Ukutshala imali nokubeka imali izinto ezimbili ezingafani. Uma ubeka imali usuke ulungiselela ikusasa ngoba kukhona ofuna ukukuthenga noma ulungiselela ukubhekana nesimo esingase sivele sidinge imali. Abantu abahlelekile-ke bayazi ukuthi, **ikusasa liyabhekelwa**.
- 2 Ukulondoloza imali kuncike ekutheni kube nesiqiniseko sokuthi uzoyithola uma usuyidinga futhi itholakale ngokushesha. Okusemqoka wukuthi imali iphephile, hhayi ukuthi iyakhula. Umqondo ovamile wukuthi silokhu sibeka kancane kancane, size sigcine sifikelele esambeni esisifunayo. Inkinga ngokulondoloza imali wukuthi ayikhuli kodwa kufanele ulokhu ufakile. Ubuhle balokho ngukuthi akuyibeki engcupheni imali yakho yize ingezukuzala into ebhekephi.
- 3 Ngakolunye uhlangothi, inhlosonqangi yokutshala imali ngukuyikhulisa nokuthi izale. Imali ikhula ngezindlela ezimbili. Eyokuqala, yinzalo etholakala uma ubolekisa ngayo kanye nokuthenga ngentengo ephansi bese udayisa ngentengo ephezulu. Zombili lezi zindlela zinamathuba amahle okukhulisa imali kodwa futhi **zinezikhinsi**. Uma uboleka abantu imali kufanele ukulindele ukuthi abanye ngeke bakhokhe. Kusemqoka ukuthi ubabhekisise abantu obabolekayo ukuthi bazokwazi yini ukukhokha nokuthi banawo yini umlando wokubuyisa imali abayibolekile. Okwesibili futhi okusemqoka, ngukuthi, kumele ukuhlelele ukuthi bakhona abantu abangeke bakhokhe.
- 4 Amabhande nezinye izinkampani ezibolekisa ngemali ziyakuhlelela ukuthi kukhona abangeke bakhokhe. Ingxenye yenzalo oyikhokhayo uma uboleke imali isuke ikhokhela nalabo abangakhokhi. Ukuhluleka ukwenza uphenyo olunzulu ngabantu obaboleka imali kungasho ukulahleka kwayo. Uma uthenga ngenhloso yokudayisa kufanele ube nesiqiniseko sokuthi uzodayisa ngentengo ephezulu kunaleyo othenge ngayo. Ake sithi udayisa izithelo emakethe, kungenzeka zingahambi ngokushesha ugcine usuphoqeka ukuthi udayise ngemali engaphansi kothenge ngayo. Lokhu kufana ncamashi nokutshala imali ngokuthenga amasheya kwi-Johannesburg Stock Exchange (JSE). Ukuthenga amasheya kuzihlanganisa zombili lezi zindlela zokukhulisa imali. Kolunye uhlangothi uboleka ibhizinisi imali ukuthi likwazi ukukhula bese likukhokhela inzalo ebizwa ngama-*dividends* njalo ngonyaka.
- 5 Uyakwazi ukwenza inzuzo uma intengo yamasheya ikhula bese uthengisa ngenani eliphezulu. Asikho-ke isiqiniseko sokuthi inkampani izokhula ikhokhe ama-*dividends* amahle okuzokhulisa intengo yamasheya owathengile. Ukungenzi kahle kwenkampani kungasho ukulahleka kwemali. Eginisweni, ukutshala imali kukubeka ethubeni elihle lokuyikhulisa yize nakho kungenaso isiqinisekiso sokuthi izokhula ngempela. Yingakho abeluleki bezokutshalwa kwemali begcizelela ukuthi kufanele utshale imali ongaphila ngaphandle kwayo. Kuyiqiniso ukuthi, ukutshala imali kungaba nemiphumela emibili; ukukhula kwayo noma ukulahleka kwayo. Ongoti ekutshalweni kwezimali bazi kahle ukuthi uma umuntu enza inzuzo, kusuke kukhona olahlekelwe yimali.

6	Ngolimi lwakhona bathi, emakethe yezimali kuhlezi kukhona izithutha. Akulona iqiniso eliminandi leli kodwa alikho elinye. Yebo kunjalo impela, inyoni yakhela ngamaqubu enye . Pho kungani abantu bekhuthazwa ukuthi batshale imali? Yikuphi okungcono phakathi kokubeka nokutshala imali? Kokubili kubalulekile, kufanele ube nayo imali oyibekile ongayithola noma nini uma uyidinga. Ngakolunye uhlangothi, uyadinga ukuba nemali oyitshalile eyenza inzalo ebonakalayo. Ukuthi ingakanani imali oyitshalayo noma oyibekayo kuncike esimeni sakho sezomnotho nokuthi yini ofuna ukuyizusa. Lokhu kubizwa phecelezi ngesiNgisi ngokuthi, " <i>Risk appetite</i> ".
7	Kungukuhlakanipha ukuba usheshe uqalelele ukuze kube nesikhathi esanele sokuthi imali ikhule. Azithi zibekwa amadaka nje, imali oyitshalile ikhule ngokushesha, kepha ukubekezela kuyaphoqa ukuze uthole inzuzo ebhekile ngokuhamba kwesikhathi njengoba inzalo nayo isuke seyenza enye inzalo. Nakhona la ekutshaleni, izikhinsi azifani. Zikhona izinhlelo ezinembuyiselo enkulu kodwa nezikhinsi zakhona zidephile. Lezi ezinezikhinsi ezincane ezingashoni kakhulu inzalo yakhona iba ncane. Izinkunzi esezimidwayidwa ekutshaleni imali ziyayibhalansisa indlela ezitshala ngayo imali. Imvamisa imali enkulu ziyifaka lapho kunengozi encane khona bese kuthi ingxenye eyodwa kwezine noma ngaphansi zijahe ngayo inzuzo ephezulu. Izimfundamakhwela zibheka kakhulu imbuyiselo enkulu zifake yonke imali ezinhlelweni ezinengozi enkulu. Ngeke sakubiza ngokutshala imali lokhu kepha ukugembula lapho ubhejela into ongayazi.
8	Kungumqondo ophusile ukusebenzisa izinkampani zokutshala imali ezinomlando omuhle ngoba zona ziyakwazi ukwenza inzuzo engcono lapho ingozi incane khona. Muva nje sekunezinkampani ezifana namabhanoyi, ezingoqhibukhowe, ezidukisa abantu. Iningi labantu abajahe inzuzo ephezulu ababe besanaka nalapho bewakwa yizigebengu ezicuthele labo abangenalo ulwazi olunzulu kulo mkhakha wokubeka nokukhulisa imali. Bathatha imali yabo yokugcina, abantwana basale bencela izithupha kujahwe umnotho osheshayo. Imvamisa, ngabantu abamnyama abahluphekayo ababa yizisulu zalezi zinkampani. Abantu bayadinga ukuzinika isikhathi, bacubungule imuva lalezi zinkampanimbumbulu.
9	Ekugcineni kusezandleni zomuntu nomuntu ukuthi ufuna ukuhlomula kangakanani. Akusizi ngalutho ukuba nengebhe usabe ukutshala imali kodwa futhi akunamqondo ukulahla imali ngokugembula ngoba ujahe ukuzusa imali esheshayo. Singaba wusizo kuwe ngakho-ke sishaye ku-031 829 5820 noma uthumele uWhatsApp/sms ku-083 354 8794. Thola ulwazi oluningi ku www.ubuntuwealth.co.za .

[Icashunwe ephephandabeni /solezwe yalungiswa]

- 1.1.1 Abantu balibhekela kanjani ikusasa ngokwale ndaba? (1)
- 1.1.2 Ukulondoloza imali, kungamthena kanjani amandla umuntu ofuna inzuzo esheshayo? (1)
- 1.1.3 Yibuphi ubuhle obugqamile ngokulondoloza imali? (1)
- 1.1.4 Igama elithi, "**izikhinsi**" elisesigabeni sesithathu, ligqamisa mqondo muni mayelana nokutshalwa kwemali? (1)

- 1.1.5 Lisu lini elisetshenziswa ngababolekisi bezimali ukuqinisekisa ukuthi abalahlekelwa yinzuzo ngenxa yokungakhokhi kwabathile? (1)
- 1.1.6 Ngokubona kwakho, ukwenza uphenyo olunzulu ngabantu inkampani ebaboleka imali, kungayilekelela kanjani ekugwemeni ukuthi ingalahlekelwa? (1)
- 1.1.7 Ukukhula kwentengo yamasheya, kunamthelela muni empumelelweni yabanikazi bamasheya kwezomnotho? (2)
- 1.1.8 Isitatimende esithi, "kufanele utshale imali ongaphila ngaphandle kwayo", sidlulisa myalezo muni kulabo abafuna ukutshala imali? (1)
- 1.1.9 Emakethe yezimali kuhlezi kukhona izithutha. Veza ukuhlobana kwalesi sitatimende nesimo sokukhuluma esibhalwe ngokugqamile esigabeni sesithupha. (2)
- 1.1.10 Veza isithombe esigqanyiswa ngokusetshenziswa kwala magama kule ndaba:
- (a) izinkunzi esezimidwayidwa (1)
- (b) izimfundamakhwela (1)
- 1.1.11 Abakwa-Ubuntu Wealth nabo bafuna inzuzo. Umbono noma yiqiniso lokhu? Sekela ngesizathu esizwakalayo. (2)

[15]

1.2 Bukisisa izithombe nombhalo olandelayo bese uphendula imibuzo ezolandela.

USibongile ufunda eYunivesithi yaseKapa, wenza unyaka wokuqala. UThemba yena ungunjiniyela enkampanini enkulu edolobheni laseKapa. Bavame ukubonana ezinxanxatheleni zezitolo uma beyothenga. UThemba wazidela amathambo.

ISITHOMBE A



ISITHOMBE B



ISITHOMBE C



ISITHOMBE D



[Isithombe sicashunwe ku-inthanethi]

- 1.2.1 Chaza imizwa evezwa ngubuso bukaSibongile esithombeni A. (1)
- 1.2.2 Akunika siph i isithombe amazwi athi, "uThemba wazidela amathambo"? (1)
- 1.2.3 USibongile uyayithanda kakhulu into ayicabangayo esithombeni C. Uyavuma noma uyaphika? Sekela impendulo yakho. (1)

- 1.2.4 "Ngingenza noma yini oyifunayo." La mazwi kaThemba esithombeni B, adlulisa myalezo muni? (1)
- 1.2.5 Impendulo kaSibongile esithombeni B, isitshela ukuthi uluhlobo luni lwesitshudeni? Chaza ngamaphuzu amabili. (2)
- 1.2.6 Kuchazani ukutubuza amagabade? (2)
- 1.2.7 Yikuphi angakwenza uThemba ukuze azuze uthando lukaSibongile? Sekela ngokubhekisa esithombeni C. (2)

[10]**Amamaki angama-25**

ISIQEPHU B UKUFINGQA**UMBULO 2****IMIYALELO**

1. Fingqa lesi siqeshana ngamagama akho aphakathi kwangama-70 kuya kwangama-80.
2. Fingqa kube yisigatshana kodwa amaphuzu agqame abe yisihlanu.
3. Ungabe usasibhala isihloko uma ufingqa.
4. Bhala inani lamagama owasebenzisile ekugcineni kwesiqeshana osifingqile.

UKUDLA

Abantu basemazweni ahlukeneyo bayazifela ngokudla kwasemazweni abo. Izwe nezwe lineziyoliyoli zalo elidume ngazo. Phela yingakho abapheki befundiswa ukupheka ukudla kwamazwe ahlukeneyo ukuze izivakashi zasemazweni zithole ukudla ezikuthandayo. Kuba kuhle izwe nezwe libambelele kokwalo ukuze libe nokuthile elizigqaja ngakho.

Abantu abaningi sebelandela lo mkhakha wokufundela ukupheka ezikhungweni zemfundo ephakeme. Abanothando nentshisekelo bagcwele ezikhungweni zemfundo ephakeme bayoqeqeshwa kulo mkhakha. Bafundiswa ukupheka iziyoliyoli zamazwe. Kuyancomeka kakhulu ukuba nolwazi olunzulu ngokudla kwasekhaya. Ngikhuluma nawe nje kukhona esebengosaziwayo kwezokupheka.

Sekunezinhlelo ezahlukehlukene kumathelevishini zokupheka. Kulezo zinhlelo kuba khona abapheki abahlukeneyo. Bonke basuke bezodlisa ngekhono lokupheka. Liyashaywa ibhodwe lapho kuze kuconse amathe kuwena obukela lolo hlelo. Okungihlaba umxhwele ukuthi, kukhona abantu bezinhlanga ezahlukeneyo nobulili obahlukeneyo. Bonke baphokophele ukuzidayisa emhlabeni jikelele. Kuzo lezo zinhlelo zethelevishini bangenela imincintiswano yokupheka.

Bapheka bebheke isikhathi ukuze bangadluli emizuzwini abayinikeziwe. Lapho basuke bepheka phambi kwezihlele namajaji. Phela abagcini ngokupheka, kufanele ukudla kwabo kubukeke ngendlela ethile eputetini ezodonsa amehlo nezokwenza amajaji achazeke. Kusuke kubhekene inkukhu nempaka. Ophumelelelayo naye ubonga anconcoze ngoba usuke edlule ngembobo yenaliti.

Muva nje imingcwabo nemishado seyaqashelwa abapheki ukuze ibe sezingeni eliphezulu. Abomndeni abafuni ukuzwa ngendaba ngomcimbi wabo yingakho beqasha abazopheka. Abapheki abagcini ngokupheka, baphinde bahlobise indawo lapho kwenzelwa khona umcimbi. Lo mkhakha uvulela abaningi amathuba omsebenzi. Ukwakheka kwamathuba emisebenzi kuyisifiso esikhulu semiphakathi yonkana. Asebethuthukile bazivulela izindawo ezidayisa ngokudla.

[Icashunwe encwadini "*IsiZulu Sethu*", Ibanga 11, ikhasi 10–11]

Uzomakwa kanje:

Amaphuzu = 5

Amagama omfundi = 3

Inani lamagama = 2

Amamaki angama-10

ISIQEPHU C IZINKONDLO**UMBUZO 3****INKONDLO ENGAFUNDWANGA EKILASINI****3.1 Funda le nkondlo elandelayo bese uphendula imibuzo ezolandela.****UMBUSO**

Ngumbuso ukuhlala emaqwaqwasini,
 Lapho kungekho namanz' okuphuza,
 Lapho kungekho nalukhuni lokubasa,
 Lapho kungekho mtholampilo nasibhedlela,
 Lapho kungekho mabhasi nazimoto,
 Nalapho kungekho zimakethe nazitolo? 6

Ngumbuso ukubhuqwabhuqwa yizifo—
 Izifo zokungondleki nokunganakekeleki.
 Izifo zokubhukud' emanzin' amponjwana,
 Izifo zokuphambana kwengqondo,
 Izifo zokuphumula emthunzini wezinkukhu,
 Nezifo zokunikela ngobuwena? 12

Ukuhamba nqunu **ngumbuso**?
 Ukuqimba ube ungalele,
 Umzimba uqungquluze
 Uhlobise ubunikiniki bezidwedwe
 Izimvula namakhaza kusine kuzibethele
 Nezifo zingene lapho zithanda ngakhona? 18

Ukulala ngamanzi **ngumbuso**,
 Nemilibo yokwakh' ukuhhuma
 Izisu nemigogodla kuhlangele,
 Ungaz' uthathan' uyihlanganise nani,
 Abanye bekuhlele' usulu besuluza
Ngoba wena umpofu bona bedla elikapondo? 24

Awakhe amasinyana alel' angamafusi.
 Ezakhe izinkonyana yiziwehle,
 Owakhe umuzi ungathi esikathekwane,
 Okwakh' ukwembath' ungath' okohlanya
 Ezakh' izingane zom' imilomo,
 Nasezizindeneni zemfundo zigcin' icala. 30

Umbuso wakhe ubumnyama bakhe'
 Umnyama wakhe ngumbuso wabo,
 Amasimu angawalima ngani?
 Umuz' awakhe ngani?
 Angenzani engasebenzi
 Kwamsebenz' engawutholi? 36
 Ukungawutholi umsebenzi **ngumbuso**,
 Konke okwakh' ukuhlupheka **ngumbuso**.

[Icashunwe encwadini ethi *Imibengo*, ikhasi 15]

- 3.1.1 Chaza ukuthi ukuxhumana-siqalo okusemgqeni wesi-2 kuya kowesi-5 kuwulolonga kanjani umqondo wale nkondlo. (2)
- 3.1.2 Chaza ukuphindwaphindwa kwegama elibhalwe ngokugqamile "ngumbuso" uveze okuhloswe yimbongi. (2)
- 3.1.3 Phawula ngomthelela wokusetshenziswa kwesifengo esisemgqeni wama-27 nowama-28 ekulolongeni umqondo wenkondlo. (2)
- 3.1.4 Amazwi athi, "ngoba wena umpofu bona bedla izambane likapondo" asemgqeni wama-24, agqamisa sithombe sini ngempilo yabantu kule nkondlo? Chaza. (2)
- 3.1.5 Umbuzombumbulu osetshenziswe esitanzeni sokugcina uqukethe myalezo muni? (2)
- [10]**

IZINKONDLO EZIFUNDWE EKILASINI**UKUNGENISA KOMNGENI** ngu-C.J. Mkhatswa**3.2 Funda le nkondlo elandelayo bese uphendula imibuzo ezolandela.****NGIYEZWA MFUNDISI**

Ngiyezwa mfundisi,
 Le ndaba oyikhulumayo
 Ingihlaba umxhwele.
 Indlebe ikhongozele,
 Ubuchopho bufuthelwa ngumzabalazo
 Wale mfihlo yomhlabathi
 Engadabuka kuwona. 7

Kuyiqiniso mfundisi,
 Ukuth' umhlabath' uyophila:
 Kuwona kuqhakaz' izithombo,
 Kuwon' kuqhakaz' izimbali
 Ekugcinen' impilo iyolotha,
 Umhlabath' ubuyel' emhlabathini,
 Uphind' ube yimvundo yomuny' umhlabathi! 14

Ngixakwa yinto yinye mfundisi,
 Yimpilo yokuphila komhlabathi
 Emuva kokuphila kwawo kulo mhlabathi.
 Mfundisi, uyakuchith' ukuphila komhlabathi
 Nesabelo sawo kumhlabath' ophilayo
 Uyasichith' isigodlo samathongo,
 Uyakuchith' ukuphila komhlabathi ngale 21

Nxa uthi mfundisi
 Indlalifa yezulu iyobuya,
 Iyobuyela muph' umhlabathi
 Oyob' usulothoke waphela
 Ungasenakh' ukuphila komphefumulo?
 Uyokuzwa ngaziph' izindlebe,
 Ngob' uyob' usubuyele lapho wavela
 Khona? 29

Ngiyezwa mfundisi,
 Uthi oBabamkhulu kabekho,
 Lowo ngumqondo nje wenkumbulo
 Nokuzikhohlisa ngethemb' elinegugu.
 Sisenkungwini mfundisi,
 Sikhulela kulona leli lofasimba,
 Nezizukulwane ziyolufica
 Zibuye zilushiye,
 Yikhona kuphila kwesizwe,
 Siyobuthana sibuthene ngomqondo,
 Yibona bumnandi bempilo,
 Pho, siyobona sekuqoqwa! 41

- 3.2.1 Ikhono le mbongi lokukhetha ukusebenzisa igama elithi, "umhlabathi" esitanzeni sesi-3 liwulolonge kanjani umqondo wale nkondlo? (2)
- 3.2.2 Isitanza sesine sivezani ngesimo sembongi? (2)
- 3.2.3 Ibinzana la magama elithi, "Pho, siyobona sekuqoqwa" lisitshela ukuthini ngomqondosimo wembongi? (2)
- 3.2.4 Kungani imbongi ibhale uhlamvu lwesibili lube lukhulu kuleli gama "oBabamkhulu"? (1)
- [7]**

3.3 Phinda futhi ufunde le nkondlo elandelayo bese uphendula imibuzo ezolandela.

NGIKUSHAYELA IHLOMBE	
Kuwna mntanomuntu Ohlamb' emifuleni yolwazi, Wahlamb' iminyakanyaka ungadeli, Kumnyama kukhanya wahlamba, Kukubi kukuhle wahlamba— Ngikushayela ihlombe.	6
Kuwna mntanomuntu Obambelel' emfundisweni yabazali, Wabambelela zilimela zonkana, Libalele liguqubele wabambelela, Lina licwebile wabambelela— Ngikushayela ihlombe.	12
Kuwna mntanomuntu Ozinze kwaNgqondonkulu, Wakleza umbele wakwaNgqondonkulu, Wakleza iminyakanyaka ngokuzimisela, Wakha ikusasa lakho nelesizwe— Ngikushayela ihlombe.	18
Kuwna mntanomuntu Owaz' imvelaphi nosikompilo, Owazis' impilo yobuntu Kule mihla yobuphekupheku Egxabh' okwembiza eziko— Ngikushayela ihlombe.	24
Kuwna mntanomuntu Owazis' amalungelo esizwe, Olwel' ubunye bukamoya Obuphaswe yisineke nomusa— Ngikushayela ihlombe.	29

- 3.3.1 Bhala wenabe, uchaze ukuthi ikhuluma ngani le nkondlo. (3)
- 3.3.2 Amazwi athi, "kumnyama kukhanya", asitshela ukuthini? (2)
- 3.3.3 Chaza imizwa yembongi eyethulwa kule nkondlo. (2)
- [7]**

3.4 Phinda futhi ufunde le nkondlo elandelayo bese uphendula imibuzo ezolandela.

NDODAKAZI YAMI

Ngikubuka ngithokoze,
Ngizwe uthotholwane lugubhazela,
Kugobhoz' umfula wezifiso ezinhle,
Kuqhakamb' imisebe yezilokoth' ezinhle,
Ngithi emhlophe indlela! 5

Sengath' amehlo akho,
Angaqhakazel' emadlelwen' aluhlaza,
Sengath' izinyawo zakho,
Zingahlamb' emfulen' ompompoza
Izithelo **zonwele olude!** 10

Sengath' izindlebe zakho,
Zingaba **ngumphongolo**
Oyogcin' amanz' okuphila,
Sengath' inhliziyo yakho
Ingaba yisigodlo selihle kakhulu! 15

Ndodakazi yami:
Lesi siban' osiphetheyo namuhla
Masibe ngumgogodla wempumelelo yakho
Masibe yinqaba yokuphephela kwesizwe,
Phel' ingwe idla ngamabala! 20

Ndodakazi yami:
Kulo mhlab' ohlabayo,
Awohamb' ukheth' amabala.
Yizithukuthuku zakho
Eziyimpumelelo yekusasa lakho! 25

Awokwazi-ke ndodakazi,
Inkonyan' ikhethwa kusakhanya,
Ngob' induk' elukhuni ima esiweni!
Thin' okwethu ukukufukula ngala mandlan' asasele,
Wen' okwakh' ukuzabalazela isiqongo sezintaba, 30
Laph' ikusasa lakho likhona!

3.4.1 Isifenqo esisemgqeni we-15, sihambelana kanjani nokushiwo yinkondlo? (1)

3.4.2 Ngokubona kwakho, izimpawu zokuloba zinamthelela muni esigqini senkondlo? (1)

3.4.3 Isimo sokukhuluma esisemgqeni wama-20 sigcizelela mqondo muni kule nkondlo? (1)

3.4.4 Ukukhethwa kwamagama angezansi enkondlweni kulekelela kanjani ekukhuliseni umqondo ojulile wenkondlo? Chaza ngokugculisayo.

- Kugobhoz' umfula
- Unwel' olude
- Umphongolo

(3)
[6]


Amamaki angama-30

ISIQEPHU D UHLELO NOKUSETSHENZISWA KOLIMI**UMBUZO 4****4.1 Bhekisisa lesi sithombe esilandelayo bese uphendula imibuzo ezolandela.**

- 4.1.1 Bhala umqondo oqukethwe igama ngalinye kwabhalwe ngokugqamile esithombeni esingenhla. (3)
- 4.1.2 Igama lokubabaza elithi, "mhh!" lihlose ukugqamisa sithombe sini? (1)
- 4.1.3 Nikeza incazelo yesimo sokukhuluma esithi, "**lehla esiphundu**". (1)
- 4.1.4 "Usuku **olumnandi** kuwe". Igama: olumnandi lenza msebenzi muni kulo musho? (1)
- 4.1.5 (a) Sebenzisa igama "inzalabantu" emshweni wakho, uveze ukuthi uyayazi incazelo yalo. (2)
- (b) Hlobo luni lwebizo leli elingenhla? (1)
- 4.1.6 Uhlamvu olubhalwe ngokugqamile egameni "ungaqali" lenza msebenzi muni emshweni? (1)

[10]

4.2 **Bhekisisa lesi sithombe esilandelayo bese uphendula imibuzo ezolandela.**



- 4.2.1 Amazwi kamama akhombisa mizwa mini ngalokhu okwenziwa ngabantwana? (1)
- 4.2.2 Kungani ubaba ethi, "**ngizizwa sengathi ngihleli ngedwa etafuleni**"? (1)
- 4.2.3 "**Yisikhathi somndeni lesi**". La mazwi asitshela ukuthini ngosikompilo lwalapha kulo muzi? (2)
- 4.2.4 Amazwi kamama athi, "**Itheckhnoloji isilibulele izwe**" angumbono noma ayiqiniso? Sekela. (2)
- 4.2.5 Imfundiso ethi, "Indoda iyinhloko yomuzi" ayigqamile lapha. Yikuphi okufakazela lokhu kulesi sithombe esingenhla? (2)

[8]

4.3 **Bhekisisa lesi sikhangiso esilandelayo bese uphendula imibuzo ezolandela.**

Hambisa Mobile Products

Izinkakha zabakhiqizi bemikhiqizo yensimbi

Xoxisana nathi kwa-Mobile Products

Sinale mikhiqizo elandelayo ongayithola noma yinini uma uyidinga:

- ***Ikhishi elihambayo***
- ***Iziqandisi ezihambayo***
- ***Izindlu zangasese***
- ***Iziteji zemigidi eyahlukene***
- ***Izitofu zegesi***
- ***Amasango ensimbi***
- ***Uthango lwensimbi***

Ubize ngegama umkhiqizo wensimbi owudingayo
Thina sizokwenzela ngokuphazima kweso!!

Yonke imikhiqizo yethu iqinile futhi inesiqiniseko sochwepheshe sokuthi iphephile.

Sitholakala kulezi zinombolo
083 762 2488/083 336 0138

Noma uzifikele mathupha enombolo-17 Boom Street, eMajuba

[Sicashunwe ecwadini "*Insika Yethu*", Ibanga 12]

- 4.3.1 Yini inhlosonqangi yalesi sikhangiso? (1)
- 4.3.2 Yikuphi okungathengwa ngumuntu ohlela ukuba nomcimbi ekhaya? (1)
- 4.3.3 Myalezo muni odluliswa yigama "**izinkakha**" elisetshenziswe kulesi sikhangiso? (1)
- 4.3.4 Bhala isu elilodwa elisetshenziswe ngumlobi ukuheha abathengi. (1)

- 4.3.5 Yimuphi umqondo olethwa ngukusetshenziswa kophawu lokubabaza kulesi sikhangiso? (1)
- 4.3.6 Ukufakwa kwekheli inkampani etholakala kulo, kumsiza kanjani umthengi? Sekela kuzwakale. (2)
- [7]

UMBUZO 5

Lungisa amaphutha obhalomagama uphinde ufake izimpawu zokuloba ezifanele esiqeshini esingezansi.

Kulesisikhathi siphila ezweni elikhululekile. kuyamangaza ukuthola iningi labantu liphila ngaphandle kokudla izindlu, amanzi ahlanzekile, ugesi izindawo zokuzikhulula. Ngisho amaholo okuhlanganela awabonwa nangokhalo. Umfundisi dlamini ungomunye ophila ngaphansi kwalesi simo. Umphakathi wasezindaweni ezihlushwa yilesi simo ukhalaza njalonje. Nangoke umfundisi naye eselibangise ekhanseleni ukuba alicele lingenelele. Ngingakusiza ngani mfundisi kubuza ikhansela lendawo.

[10]

Amamaki angama-35

Amamaki esewonke: 100